



«25» ապրիլի 2024թ.  
N 34-01

## ՀՀ վարչապետ Նիկոլ Փաշինյանին

Հարգելի պարոն վարչապետ

Համաձայն ՀՀ Հարկային օրենսգրքի 156 հոդվածի՝ ուժի մեջ է մտել ֆիզիկական անձանց եկամուտների տարեկան հայտարարագիր (հաշվարկ) ներկայացնելու պահանջը:

ՀՀ կառավարության 2023 թվականի հունիսի 29-ի N1067-Ն որոշմամբ սահմանված է, որ ֆիզիկական անձի կողմից վերը նշված հայտարարագիրը ներկայացնելու դեպքում ֆիզիկական անձը ստանում է իր և իր ընտանիքի անդամների համար կատարված սոցիալական ծախսերի (*առողջության ապահովագրական փաթեթ, ուսման վճար*) փոխհատուցման իրավունք: Որոշմամբ սահմանված է, որ փոխհատուցման համար անհրաժեշտ է, որպեսզի սոցիալական ծախսի հետ կապված հաշվարկային փաստաթղթերում ներառված լինեն ծառայությունը ստացող ֆիզիկական անձի և սոցիալական ծախսը կատարած ֆիզիկական անձի անձնական տվյալները, այդ թվում՝ ՀԾՀ-ն:

Մեր միության անդամներից ստացել ենք ահազանգեր այն մասին, որ ֆիզիկական անձինք եկամուտների տարեկան հայտարարագիրը ներկայացնելուց չեն կարողանում օգտվել զավակի ուսման վճարի փոխհատուցման իրավունքից: Պատճառն այն է, որ շատ դեպքերում, թեպետ վճարը տրամադրել է ծնողը, ուսման վճարի վճարման բուն գործընթացը կատարել են նրանց զավակները: Նման դեպքերում ուսումնական հաստատությունները դուրս գրված հաշվարկային փաստաթղթերում ներառում են միայն ուսանողի (վճարողի) անձնական տվյալները:

Ստացվում է, որ չնայած 2023 թվականի հայտարարագիր ներկայացնող հայտարարատու անձը ընտանիքի անդամի համար կատարել է սոցիալական ծախս, բայց այդ ծախսի փոխհատուցումից զրկվում է վճարման գործընթացը ոչ անձամբ կազմակերպելու պատճառով:

Հաշվի առնելով, որ շատ դեպքերում ուսման վարձի վճարի մուտքագրումը կատարում են հենց ուսանողները, կարևորելով **բոլոր** հայտարարատու անձանց կողմից սոցիալական ծախսի փոխհատուցման իրավունքն իրացնելու

հնարավորությունը և, ղեկավարվելով «Արհեստակցական միությունների մասին» ՀՀ օրենքի հոդված 21-ով, խնդրում ենք փոփոխություն կատարել ՀՀ կառավարության 2023 թվականի հունիսի 29-ի N1067-Ն որոշման մեջ՝ հնարավորություն տալով հայտարարատու ֆիզիկական անձանց փոխհատուցում ստանալ զավակների ուսման վճարի համար այն դեպքերում, երբ հաշվարկային փաստաթղթերում ներառված է միայն ուսման ծառայությունը ստացողի անձնական տվյալները:

Հաշվի առնելով, որ 2023 հաշվետու տարվա հայտարարագրերի ներկայացման վերջնաժամկետը 2024թ. հուլիսի 22-ն է՝ խնդրում ենք հնարավոր օրենսդրական փոփոխության ընդունման հնարավորությունը դիտարկել սեղմ ժամկետներում, որպեսզի վերը նշված իրավիճակում հայտնված հայտարարատու անձինք մինչև վերջնաժամկետը կարողանան օգտվել սոցիալական ծախսի փոխհատուցման իրավունքից:

Հարգանքով՝  
**Հայաստանի պետհիմնարկների,  
ՏԻՄ-երի աշխատողների  
նախագահ՝**

**Անահիտ Ասատրյան**